



საქართველოს კომუნიკაციების ეროვნული კომისია

გადაწყვეტილება

N გ-19-5/356
06/06/2019

356-შ-19-1-4-201906061651



აიპ „რადიო ათინათის“ კერძო მაუწყებლობის №B48 ლიცენზიის აიპ „ასოციაცია ათინათისთვის“ გადაცემაზე თანხმობის მიცემის შესახებ

საქართველოს კომუნიკაციების ეროვნული კომისია (შემდგომში „კომისია“) აღნიშნავს, რომ 2019 წლის 2 მაისს კომისიას ერთობლივი განცხადებით მიმართეს აიპ „ასოციაცია ათინათმა“ (ს/კ220014464) და აიპ „რადიო ათინათმა“ (ს/კ 420429101) (წერილის კომისიაში რეგისტრაციის №შ-19-7/2009) აიპ „რადიო ათინათის“ მფლობელობაში არსებული კერძო მაუწყებლობის №B48 ლიცენზიის აიპ „ასოციაცია ათინათისთვის“ გადაცემის მიზნით, კომისიისგან წინასწარი თანხმობის მიღების მოთხოვნით. როგორც წერილშია აღნიშნული 2019 წლის 7 მარტის N139/5 გადაწყვეტილებით თანხმობა მიეცა აიპ „ასოციაცია ათინათს“ კერძო მაუწყებლობის №B48 ლიცენზიის აიპ „რადიო ათინათისთვის“ გადაცემაზე. კომისიისგან თანხმობის მიღების შემდგომ აიპ „ასოციაცია ათინათმა“ დაიწყო მატერიალური აქტივების გადაცემის პროცედურები აიპ „რადიო ათინათისთვის“. რა დროსაც წარმოიშვა გადაულახავი პრობლემები, კერძოდ: აიპ „რადიო ათინათისთვის“ აქტივების გადაცემა აღძრა მოგებისა და დღგ-ს გადასახადებით დაბეგვრის საგადასახადო ვალდებულებები (აიპ „ასოციაცია ათინათს“ დაეკისრა დღგ-ს გადასახადი, ხოლო აიპ „რადიო ათინათს“ მოგების გადასახადი) რაც იმდენად დიდ დანახარჯებს უკავშირდება, რომ მათი გადახდა ორგანიზაციის შესაძლებლობებს აღემატება. აიპ „ასოციაცია ათინათი“ ძირითად საქმიანობას საერთაშორისო დონორი ორგანიზაციებიდან მიღებული გრანტებით ახორციელებს, მისი ბიუჯეტის ყველა მუხლი მიზნობრივად არის გაწერილი, რაც ამ ხარჯების გაწევის შესაძლებლობას არ იძლევა. ამით საშიშროება დაემუქრა ორივე იურიდიულ პირს, რადგან ერთი ვერ ახერხებს მეორის საქმიანობისთვის აუცილებელი ტექნიკური საშუალებებისა და სხვა აქტივების გადაცემას. აღნიშნულიდან გამომდინარე კომპანიებმა მიიღეს გადაწყვეტილება შეწყვიტონ გამოყოფის პროცედურები. შესაბამისად კომისიას მიმართეს აიპ „რადიო ათინათის“ მფლობელობაში არსებული კერძო მაუწყებლობის №B48 ლიცენზიის აიპ „ასოციაცია ათინათისთვის“ გადაცემაზე თანხმობის მიცემის მოთხოვნით.

კომისია აღნიშნავს, რომ „მაუწყებლობის შესახებ“ საქართველოს კანონის 48¹-ე მუხლის შესაბამისად, ლიცენზიის სხვა პირისათვის გადაცემა შესაძლებელია, მხოლოდ კომისიის წინასწარი თანხმობით. „ლიცენზიებისა და ნებართვების შესახებ“ საქართველოს კანონის მე-3 მუხლის პ) ქვეპუნქტის შესაბამისად, ლიცენზიის მფლობელი არის პირი, რომელსაც ადმინისტრაციული აქტის საფუძველზე მინიჭებული აქვს უფლება, განახორციელოს ლიცენზიით განსაზღვრული საქმიანობა, ისარგებლოს რესურსით, ან სხვა ლიცენზიის მფლობელის მიერ გადაცემული აქვს ლიცენზირებადი საქმიანობის განხორციელების უფლება.



„მაუწყებლობის შესახებ“ საქართველოს კანონის 37-ე მუხლის მე-2 პუნქტის და 37¹-ე მუხლის პირველი პუნქტის გ) ქვეპუნქტის შესაბამისად, მაუწყებლობის სფეროში ლიცენზიის მფლობელი/ავტორიზებული პირი ან მისი ბენეფიციარი მესაკუთრე არ შეიძლება იყოს:

ა) ადმინისტრაციული ორგანო;

ბ) ადმინისტრაციული ორგანოს თანამდებობის პირი, სხვა საჯარო მოხელე;

გ) ადმინისტრაციულ ორგანოსთან ურთიერთდამოკიდებულების მქონე იურიდიული პირი;

დ) პოლიტიკური პარტია, პოლიტიკური პარტიის თანამდებობის პირი;

ე) ოფშორულ ზონაში რეგისტრირებული იურიდიული პირი;

ვ) იურიდიული პირი, რომლის წილს ან აქციებს პირდაპირ ან ირიბად ფლობს ოფშორულ ზონაში რეგისტრირებული პირი.

ამავე კანონის 37-ე მუხლის მე-3 პუნქტის შესაბამისად ლიცენზიის მფლობელი/ავტორიზებული პირი აგრეთვე არ შეიძლება იყოს პირი, რომლის ბენეფიციარი მესაკუთრე არის სხვა სახელმწიფოს ამ მუხლის მე-2 პუნქტის „ა“, „ბ“ ან „გ“ ქვეპუნქტით განსაზღვრული პირი/ორგანო, გარდა საქართველოს საერთაშორისო ხელშეკრულებით გათვალისწინებული შემთხვევისა.

კომისია აღნიშნავს, რომ ააიპ „რადიო ათინათი“ ფლობს კერძო მაუწყებლობის №B48 ლიცენზიას კომისიის 2011 წლის 30 დეკემბრის N831/6, 2014 წლის 25 აგვისტოს N481/2, 2015 წლის 24 დეკემბრის N813/22, 2019 წლის 7 მარტის N139/5 გადაწყვეტილებებით და ააიპ „ასოციაცია ათინათსა“ და ააიპ „რადიო ათინათს“ შორის 2019 წლის 29 მარტს გაფორმებული ხელშეკრულების საფუძველზე შემდეგი სალიცენზიო პირობებით:

- ა) ლიცენზიის სახე: რადიომაუწყებლობა;
- ბ) ლიცენზიის სახეობა: კერძო მაუწყებლობა;
- გ) კერძო მაუწყებლობის ქვესახეობა: საერთო მაუწყებლობა;
- დ) მაუწყებლობის ენა/ენები: ქართული, რუსული.
- ე) მაუწყებლობის ტექნიკური პარამეტრები:

გადამცემის და ანტენის განთავსების ადგილი	სიხშირე (მჰც)	მოდულაცია	პოლარიზაცია V / H	გასხივება	გადამცემის სიმძლავრე (ვტ)	გეოგრაფიული კოორდინატები	ანტენის დაკიდების სიმაღლე მიწის ზედაპირიდან (მ)	ანტენის გაბლიერების კოეფიციენტი (დბ)
სოფ. ცაიში ურთას მთა	105.9	FM	V	წრიული	2000	42°24'48"N 41°49'06"E	40	4-6
ქ. ზუგდიდი	105.9	FM	V	წრიული	100	42°30'25"N 41°52'10"E	15	8

ზემოაღნიშნული გადამცემი სადგურის განთავსება შესაძლებელია მითითებული კოორდინატის მიმართ 500მ რადიუსის ფარგლებში, ზღვის დონიდან გადამცემი ანტენის დაკიდების სიმაღლის შენარჩუნებით (ცდომილება±5მ).

ვ) მაუწყებლობის გავრცელების გეოგრაფიული ზონა: გადამცემი სადგურების ტექნიკური პარამეტრების შესაბამისი მომსახურების სახმელეთო ტერიტორია, რომელიც პირობითად შემოსაზღვრულია ამ ტერიტორიაზე განთავსებული სადგურების მიერ შექმნილი სამაუწყებლო დონის სიგნალის ზღვრული მინიმალური მნიშვნელობის მქონე წერტილთა ერთობლიობის მომკლებით.

კომისია აღნიშნავს, რომ მეწარმეთა და არასამეწარმეო (არაკომერციული) იურიდიული პირების ამონაწერიდან და კომისიაში წარმოდგენილი შესაბამისობის დეკლარაციიდან ირკვევა, რომ ააიპ „ასოციაცია ათინათის“ გამგეობის თავმჯდომარე/წევრია გია ხასია (პ/ნ 42001005630), გამგეობის თავმჯდომარის მოადგილე/წევრია რუსუდან ყალიჩავა (პ/ნ 42001005629) და გამგეობის წევრია ირაკლი ყალიჩავა (პ/ნ 19001003085). კომისიაში წარმოდგენილი შესაბამისობის დეკლარაციით კომპანიის გამგეობის თავმჯდომარე ადასტურებს, რომ ააიპ „ასოციაცია ათინათი“, ან/და მისი წევრები არ წარმოდგენენ: საქართველოს ან სხვა სახელმწიფოს ადმინისტრაციულ ორგანოს, ადმინისტრაციული ორგანოს თანამდებობის პირს, სხვა საჯარო მოხელეს, ადმინისტრაციულ ორგანოსთან ურთიერთდამოკიდებულების მქონე იურიდიულ პირს. საქართველოს ან სხვა სახელმწიფოს პოლიტიკურ პარტიას, პოლიტიკური პარტიის თანამდებობის პირს; ოფშორულ ზონაში რეგისტრირებულ იურიდიულ პირს; იურიდიულ პირს, რომლის წილს ან აქციებს პირდაპირ ან ირიბად ფლობს ოფშორულ ზონაში რეგისტრირებული პირი.

კომისია აღნიშნავს, რომ კომისიის აპარატის ლიცენზირების, ავტორიზაციისა და ნებართვების დეპარტამენტის მიერ გადამოწმდა ააიპ „ასოციაცია ათინათის“ გამგეობის წევრების გია ხასიას (პ/ნ 42001005630), ირაკლი ყალიჩავა (პ/ნ 19001003085) და რუსუდან ყალიჩავას (პ/ნ 42001005629) მონაცემები საჯაროდ ხელმისაწვდომ თანამდებობის პირთა ქონებრივი დეკლარაციების ვებ-გვერდზე www.declaration.gov.ge. გადამოწმების შედეგად გია ხასიას, ირაკლი ყალიჩავას და რუსუდან ყალიჩავას მიერ შევსებული ქონებრივი მდგომარეობის დეკლარაციები მითითებულ ვებ-გვერდზე არ იძებნება. ასევე ზემოაღნიშნული ფიზიკური პირების მონაცემები გადამოწმდა მოქალაქეთა პოლიტიკური გაერთიანებების (პარტიების) რეესტრის ვებ-გვერდზე (www.napr.gov.ge), გადამოწმების შედეგად ზემოაღნიშნული ფიზიკური პირების მონაცემები მითითებულ ვებ-გვერდზე არ იძებნება.

კომისია ასევე აღნიშნავს, რომ ”მაუწყებლობის შესახებ” საქართველოს კანონის მე-60 მუხლის პირველი პუნქტის თანახმად, პირს უფლება აქვს, დამოუკიდებლად ან მასთან ურთიერთდამოკიდებულების მქონე პირთან ერთად თითო მომსახურების ზონაში ფლობდეს არაუმეტეს 1 საერთო საეთერო სატელევიზიო არხს და 1 საერთო საეთერო რადიოარხს. კომისიის უწყებრივი რეესტრის მონაცემებით ააიპ „ასოციაცია ათინათი“ არ ფლობს მაუწყებლობის სფეროში ლიცენზიას ან ავტორიზაციას.

კომისია ასევე აღნიშნავს, რომ კომისიის უწყებრივი სალიცენზიო რეესტრის მონაცემებით ააიპ „ასოციაცია ათინათის“ და ფიზიკური პირების გია ხასიას, ირაკლი ყალიჩავას და რუსუდან ყალიჩავას აფილირება მაუწყებლობის სფეროში ავტორიზაციის ან ლიცენზიის მფლობელ სხვა პირებთან არ ფიქსირდება.

კომისია აღნიშნავს, რომ 2019 წლის 6 ივნისს გამართულ კომისიის სხდომას არ ესწრებოდა ააიპ „ასოციაცია ათინათის“ წარმომადგენელი.

კომისია ასევე აღნიშნავს, რომ ააიპ „რადიო ათინათის“ მფლობელობაში არსებული კერძო მაუწყებლობის №B48 ლიცენზიის ააიპ „ასოციაცია ათინათისთვის“ გადაცემის შემთხვევაში ზემოაღნიშნული ლიცენზიით გათვალისწინებული სალიცენზიო პირობები და ვალდებულებები უცვლელი სახით გადავა ლიცენზიის ახალ მფლობელზე.

ზემოაღნიშნულიდან გამომდინარე, კომისიას მიაჩნია, რომ არ არსებობს ააიპ „რადიო ათინათის“ მიერ მის მფლობელობაში არსებული კერძო მაუწყებლობის №B48 ლიცენზიის ააიპ „ასოციაცია ათინათისთვის“ გადაცემაზე წინასწარი თანხმობის მიცემის დამაბრკოლებელი გარემოება გათვალისწინებული „მაუწყებლობის შესახებ“ საქართველოს კანონით და შესაბამისად, შესაძლებელია ააიპ „რადიო ათინათს“ მიეცეს წინასწარი თანხმობა, მისი კუთვნილი კერძო მაუწყებლობის ლიცენზიის გადაცემაზე.

ყოველივე ზემოაღნიშნულის გათვალისწინებით, კომისიამ „მაუწყებლობის შესახებ“ საქართველოს კანონის 37-ე მუხლის, 48¹-ე და მე-60 მუხლებიდან გამომდინარე, კენჭისყრის შედეგად, ერთხმად

გ ა დ ა წ ყ ვ ი ტ ა :

1. მიეცეს თანხმობა ააიპ „რადიო ათინათს“ მის მფლობელობაში არსებული კერძო მაუწყებლობის №B48 ლიცენზიის ააიპ „ასოციაცია ათინათისთვის“ გადაცემაზე;

2. უზრუნველყოს ააიპ „ასოციაცია ათინათმა“ კერძო მაუწყებლობის №B48 ლიცენზიის სარგებლობაში მიღებიდან 5 სამუშაო დღის ვადაში, ლიცენზიის სარგებლობაში მიღების შესახებ ინფორმაციის, შესაბამისი დოკუმენტაციის ასლებისა და შესაბამისობის დეკლარაციის კომისიისთვის მიწოდება;

3. განემარტოს ააიპ „ასოციაცია ათინათს“, რომ ააიპ „რადიო ათინათის“ მიერ მის მფლობელობაში არსებული კერძო მაუწყებლობის №B48 ლიცენზიის ააიპ „ასოციაცია ათინათისთვის“ გადაცემის შემთხვევაში ზემოაღნიშნული ლიცენზიებით გათვალისწინებული სალიცენზიო პირობები და ვალდებულებები უცვლელი სახით გადავა ლიცენზიის ახალ მფლობელზე.

4. დაევალოს კომისიის აპარატის ლიცენზირების, ავტორიზაციისა და ნებართვების დეპარტამენტს ააიპ „ასოციაცია ათინათის“ მიერ კერძო მაუწყებლობის №B48 ლიცენზიის სარგებლობაში მიღების შესახებ ინფორმაციის, შესაბამისი დოკუმენტების ასლებისა და შესაბამისობის დეკლარაციის კომისიაში წარმოდგენის შემდგომ:

ა) სათანადო მონაცემების კომისიის სალიცენზიო რეესტრში შეტანა (მ. ქადეიშვილი);

ბ) სალიცენზიო მოწმობის გაცემის უზრუნველყოფა (მ. ქადეიშვილი);

გ) ლიცენზიის გადაცემის თაობაზე ინფორმაციის „საქართველოს საკანონმდებლო მაცნეში“ გაგზავნის უზრუნველყოფა (მ. ქადეიშვილი);

დ) შესაბამისობის დეკლარაციის კომისიის ვებ-გვერდზე ატვირთვის უზრუნველყოფა (მ. ქადეიშვილი);

5. დაევალოს კომისიის ადმინისტრაციას აღნიშნული გადაწყვეტილების დამოწმებული ასლების ააიპ „რადიო ათინათისთვის“ და ააიპ „ასოციაცია ათინათისთვის“ გაგზავნა (ნ. ჯავახიძე) და კომისიის ოფიციალურ ვებ გვერდზე (www.gncc.ge) გამოქვეყნება (ნ. შოვნაძე);

6. გადაწყვეტილება ძალაში შევიდეს კომისიის ოფიციალურ ვებ გვერდზე (www.gncc.ge) გამოქვეყნებისთანავე;

7. გადაწყვეტილება შეიძლება გასაჩივრდეს ქ. თბილისის საქალაქო სასამართლოს ადმინისტრაციულ საქმეთა კოლეგიაში (მისამართი: ქ.თბილისი, დ.აღმაშენებლის ხეივანი მე-12 კმ., №6) ჩაბარებიდან ერთი თვის ვადაში;

8. კონტროლი აღნიშნული გადაწყვეტილების შესრულებაზე დაევალოს კომისიის აპარატის ლიცენზირების, ავტორიზაციისა და ნებართვების დეპარტამენტს (მ. ქადეიშვილი).

ელისო ასანიძე

კომისიის წევრი

გიორგი ფრუიძე

კომისიის წევრი

ვახტანგ აბაშიძე

კომისიის წევრი

მერაბ ქათამაძე

კომისიის წევრი

კახი ბექაური

კომისიის თავმჯდომარე